



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Von weltlicher vberkeytt wie weytt man yhr gehorsam
schuldig sey**

Luther, Martin

[Erfurt], 1523

VD16 L 7310

Das Ander Teyll. Wie weytt sich weltlich vberkeytt strecke.

urn:nbn:de:hbz:466:1-32227

meyne suchte/sondern das das vbel gestrafft würde! Antwort/ solch wunder ist nicht vnmöglich/ Aber gar selzam vnnnd ferlich. Wo der geyst so reich ist/da mag's wol geschehen/ Den so lesen wir von Samson Judic: .15. das er spricht/ Ich habe yhn than/wie sie myr thann habenn / so doch da widder sage Prouerb: .24. Sage nicht/ Ich will yhm thun/wie er myr than hatt. Vñ. 20. Spricht nicht/ Ich will ym das böße vergelten. Denn Samson war von Gott dartzu erfodderet/ das er die Philistiner plagen sollte/vnnd die kinder Israel erredten/ ob er nu woll vsach an yhnn nam / das er seyn sache furwand/ so thett ers doch nicht/ sich selb zu rechen oder das seyne zu suchen/sondern andern zu dienst vnd zur straff der Philistiner. Aber dem crempel wirt niemant folgen/er sey denn eyn rechter Chrusten vnnd voll geysts. Wo die vernunft auch so thun will/wirde sie wol furgebenn/sie wolle nicht das yhre suchen / aber es wirde ym grund falsch seyn / Denn on gnade ist's nicht möglich / Darumb werde zuuor wie Samson / so kanstu auch thun wie Samson.

Das Ander Teyll.

Wie weyte sich welltlich
vberkeyt strecke.

NJe kommen wyr zum heubtstück
dieses sermons/Denn nach dem wir gelernet haben/das die welltlich vberkeyt seyn muß aufferden/vnnd wie man der selben Chrustlich vnnd seliglich brauchen solle/müssen wyr nun lernen/wie lang yhr arm vnd wie fern yhr hand reichen/ das sie sich nicht zu weyte strecke/ vnnd Gott ynn seyn reich vnd regiment greyffe/ Vnnd das ist fast nott zu wissen/ Den vntreglich vnd grewlich schaden drauß folget/wo man yhr zu weyte raum gibt/vñ auch nicht on schaden ist/ wo sie zu enge gespannen ist/ hie strafft sie zu wenig/dort strafft sie zu viel. Wie wol es treglicher ist/ das sie auff diser seyten sundige vnd zu wenig straffe/den das sie auff yhener seyten sundige vñ zu viel straffe/ Syntemal es allzeyt besser ist/ein buben leben lassenn/ denn ein frumen man tödten/nach dem die wellt doch buben hatt vnd haben muß/der frumen aber wenig hatt.

Aufferst/ Ist zu mercken/das die zwey teyl Adams Kinder/der eyns
ynn Gottis reich vnter Chusto / das ander ynn der welt reich vnter
der vberkeyt ist (wie dioben gesagt) zweyerley gesetz haben / Denn eyn
iglich reich muß seyne gesetz vnd rechte haben/vnd on gesetz kein reich
noch regiment bestehen kann/wie das gnugsam teglich erfahrung gibt.
Das weltlich regiment hatt gesetz/die sich nicht weytter strecken/denn
vber leyb vnd gütt/vnd was eufferlich ist auff erden. Den vber die seele
kan vnn will Gott niemant lassen regirn/denn sich selbs alleyne. Da-
rumb wo weltlich gewalle sich vermisset / der seelen gesetz zu geben/do
greiffst sie Gott ynn seyn regiment/vnd verforet vnd verderbet nur die
seelen/Das wollen wyr so klar machenn/ das mans greiffen solle/auff
das vnser unckern die fursten vnn bischoffe sehen/ was sie fur narren
sind/wenn sie die leute mit yhren gesetzen vnn gepotten zwingen wol-
len/sonst oder so zu glewben.

Wenn man ein menschen gesetz auff die seelen legt/das sie soll glew-
ben sonst oder so/wie der selb mensch fur gibt/so ist gewislich da nicht
Gottis wort / Ist Gottis wort nicht da/ so ist vngewis/ obs Gott
haben will/ Den was er nicht gepeut/das kan man nicht gewis seyn/
das yhm gefalle. Ya man ist gewis/das es Gott nicht gefalle/Denn er
will vnsern glawben/bloß vnd lautter alleyn auff sein götlich wort ge-
grund haben/wie er spricht Matt: .18. Auff disen fels will ich meyne
Kirche bawen. Vnd Joh: 10. Meyne schaff hören meyne stym vnn
kennen mich/ aber der frembden stym hören sie nicht / sondern fliehenn
von yhn. Darauff folget den/das weltlich gewalle die seelen zum ewi-
gen todt dinget mit solchem freuel gepott/ Denn sie zwinget solchs zu
glewben/ als das recht vnd gewis Gott gefällig sey/ vnd ist doch vn-
gewis/ ia gewis das missfallet/weyl keyn klar Gottis wort da ist/Den
wer das fur recht glewbt/das vnrecht ader vngewis ist/der verleucket
die warheyt/die Gott selber ist/vnd glewbt an die lügen vnd yrrhum/
helt das fur recht das vnrecht ist.

Darumb ist gar vberaus ein nerricht ding/wen sie gepieten/ man
solle der Kirchen/den Vetern/Concilien/glewben/ob gleych keyn Got-
tis wort da sey/ Teuffels Apostel gepieten solchs/ vnd nicht die kirche/
Denn die kirche gepeut nichts/sie wisse denn gewis/das Gottis wort
sey/wie S. Petrus sagt. Wer da redet/der rede/ als Gottis wort/ Sie
werden aber gar lange nicht beweyßen/das der Concilien setze/Gottis
wort sind. Viel nerrichter ist aber/ wenn man sagt/ die Könige vnn
fursten vñ die menge glewbt also. Lieber wyr sind nicht getaufft auff

könige/ fürsten noch auff die menge/ sondern auff Christum vnd Gott
selber/ Wyr heysen auch nicht/ könige/ fürsten oder menge/ wir heysen
Christen. Der seelen soll vnd kan niemandt gepieten/ er wisse denn yhe
den weg zu weysen gen hymel/ Das kan aber keyn mensch thun/ sondern
Gott alleyn. Darumb ynn den sachen/ die der seelen selickeyt betreffen/
soll nichts denn Gottis wort geleret vnd angenommen werden.

Item/ wen sie gleich grob narren sind/ so müssen sie ia das bekenn/
nen/ das sie keyn gewalt vber die seelen habenn. Denn es kan yhe keyn
mensch eyn seele tödten oder lebendig machen/ gen hymel odder helle
furen/ vñ ob sie vns des nicht glewben wollten/ wirt yhe Christus das
starck gnüg zeugen/ da er spricht Matthei am zehenden. Furcht euch
nicht fur denen/ die den leyb tödten/ vnd darnach nichts haben/ das sie
thun/ furcht aber deiten/ der nach dem er den leyb tödret/ macht hate
ynn die helle zuuerdamnen. Ich meyn yhe/ das hie klar gnüg die seele
auff aller menschen hand genomen/ vnd alleyne vntter Gottis gewalt
gestellet sey. Tu sage myr/ Wie viel wize muß der kopff wol habē/ der
an den ort gepott legt/ da er gar kein gewalt hat? Wer wolt den nicht
fur vnsynnig hallten/ der dem Mond gepötte/ er solt scheynen wenn er
woltte? Wie feyn würd sichs reymen?

Wenn die zu Leypzig vns zu Wittemberg/ oder widerrumb/ woyr zu
Wittemberg denen zu Leypzig wolten gepott aufflegen/ man würde
gewißlich nyße wortz denn gepietern zu danck schenckenn / das sie das
hyrn segten vnd den schnuppen büßeten. Noch faren igt vnser Key/
ser vnd klüge fürsten also/ vnd lassen sich Bapst/ Bischoff vnd So/
phisten dahyn furen/ eyn blynd den andern/ das sie yhren vnterthanen
gepieten zu glewben/ on Gottis wortz/ wie sie es gütt dunckt/ vñ wol/
len dennoch Christliche fürsten heysen/ da Gott für sey.

Vber das/ mag mans auch dabey greysen/ das eyn iglich gewalt/
soll vnd mag nur da handelln/ da sie/ sehen/ erkennen/ richten/ vrteylen/
wandeln vnd endern kan. Den was were myr das für eyn richter/ der
blind hyn richten wolt/ die sachen/ die er widder höret noch siber? Tu
sage myr/ wie kan die hertzen sehen/ erkennen/ richten/ vrteylen/ vnd en/
dern/ eyn mensch? Denn solchs ist alleyn Gott für behalten/ wie ps. 7.
sagt. Gott forschet hertzen vnd nieren. Item/ Der herr ist richter vber
die leutt. Vnd act. am .10. Gott ist eyn hertzkundiger. Vñ Jeremias
.1. Böß vñ vnerforschlich ist menschlichs hertz/ wer magt erforschē?
Ich der herr/ der die hertzen vnd nieren forschet. Eyn gericht soll vnd
muß gar gewiß seyn/ wen es vrteylen sol/ vñ alles am hellen liecht habē.

Aber der seelen gedancken vñ synnen/kunnen niemant den Gott offen/
bar seyn. Darumb es vmb sunst vnd vnmüglich ist/ yemandt zu gepiet/
ten oder zu zwingen mit gewalle/ sonst oder so zu glawben. Es gehört
eyn ander gryff dazu/ Die gewalle thutts nicht. Vnnd mich wundere
der grossen narren/ Syntemal sie selb alle sampt sagen. De occultis nō
iudicat Ecclesia. Die kirche richtet nicht heymlich sachen. So den die
kirche yhr geystlich regiment nur offentlich ding regirt/ Wes vnter sie
sieh denn die vn synnige weltliche gewalldt/ solch heymlich/geystlich/
verporigen ding/ als der glawb ist/ zu richten vnd meystern?

Auch so ligt eym iglichen seyne eygen fahr dran/ wie er glawbt/ vñ
muß fur sich selb sehen/ das er recht glawbe. Denn so wenig als eyn an/
der fur mich ynn die helle oder hymel faren kan / so wenig kan er auch
fur mich glawben oder nicht glawben/ vnd so wenig er myr kan hymel
oder hell/ auff odder zu schliessen/ so wenig kan er mich zum glawben
oder vnglauben treyben. Weyles den eym iglichen auffseym gewissen
ligt/ wie er glawbt odder nicht glawbt/ vnnd damit der weltlichen ge/
walt keyn abbuch geschicht/ soll sie auch zu friden seyn/ vñ yhris dings
warten/ vnd lassen glawben sonst oder so/ wie man kan vnd will/ vnd
niemant mit gewalle dungen. Den es ist eyn frey werck vmb den glaw/
ben/ dazu man niemant kan zwingen. Ya es ist eyn götlich werck ym
geyst/ schweyg denn/ das es enßerliche gewalldt sollt erzwingenn vnnd
schaffen. Da her ist der gemeyne spruch genomē/ den Augustinus auch
hatt. Zum glawben kan vnd soll man niemants zwingen.

Dazu sehen die blinden elenden leute nicht/ wie gar vergeblich vnd
vnmüglich ding sie fur nehmen. Denn wie hart sie gepieten/ vnnd wie
fast sie toben/ so kunden sie die leute yhe nicht weytter dungen/ den das
sie mit dem mund vnnd mit der hand yhr folgen/ das hertz mügen sie
ia nicht zwingen/ solten sie sich zu reyssen. Den war ist das sprichwort/
Gedanckenn sind zoll frey. Was istts denn nu/ das sie die leute wollen
zwingen zu glawben ym hertzen/ vñ sehen das vnmüglich ist? treyben
damit die schwachen gewissen mit gewalle/ zu liegen/ zunerlencken/ vnd
anders sagen/ den sie es ym hertzen halten / vnnd beladen sieh selb also
mit grewlichen frembden sunden/ Den alle die lügen vnd falsch bekent/
nis/ die solch schwach gewissen thun/ gehen vber den/ & sie erzwinget.
Es were yhe viel leychter/ ob gleych yhr vnterhan yrreten / das sie sie
schlecht yrren lieffen/ denn das sie sie zur lügen vnnd anders zu sagenn
dungen/ wenn sie ym hertzen haben/ Auch nicht recht ist/ das man bö/
ßes mit ergern weren will.

Aber wiltu wissen/ warumb Gott verhetzet/ das die weltliche
Fürsten also gewaltlich müssen anlauffen? Ich will dir sagen. Gott
hatt sie ynn verkereten synn geben/ vnd will eyn ende mit yhn machen/
gleich wie mit den geystlichen iunckern. Den meyn vngenedigen hern/
Papst vnd Bischoffe/ sollten bischoffe seyn/ vnd Gottis wortt predi-
gen/ das lassen sie/ vnd sind weltliche fürsten worden/ vnd regirn mit
gesetzen/ die nur leyb vnd güt betreffen. Seyn haben sie es vmbkeret/
ynnerlich solten sie regirn die seelen durch Gottis wortt/ so regirn sie
außwendig schlösser/ stedt/ land vnd leutt/ vnd martern die seelen mit
vnsegllicher mörderey. Also auch die weltlichen herin/ solten land vnd
leutt regieren eußerlich/ das lassen sie/ Sie künden nicht mehr/ den schin/
den vnd schaben/ eyn zoll auff den andern/ eyn zinse vber die andern
setzen/ da eyn bern/ hie eyn wolff auß lassen/ Dazu kein recht trew noch
warheyt bey yhn lassen funden werden/ vnd handelln das reuber vnd
buben zu viel weren/ vñ yhr weltlich regiment ia so tieff darnyder ligt/
als der geystlichen Tyrannen regiment. Darumb verkeret Gott yren
synn auch/ das sie zufaren widder synnisch/ vnd wollen geystlich vber
seelen regirn/ gleich wie yhene wollenn weltlich regirn/ auff das sie ia
getrost auff sich laden frembd sund/ Gottis vnd aller menschen haß/
biß sie zu scheyttern gehen/ mit Bischoffen/ pfaffen vnd münchen/
eyn bube mit dem andern/ vnd darnach des alles dem Euāgelio schuld
geben/ vnd an stad yhrer beycht/ Gott leßtern/ vnd sagen/ vnser predigt
hab solchs zugericht/ wilchs yhr verkerethe bossheyt verdienet hat/
vnd noch verdienet on vnterlaß/ wie die Römer auch thetten/ do sie
verstöret wurdenn. Sibe/ da hastu den rade Gottis/ vber die grossenn
hanffen. Aber sie sollens nicht glewben/ auff das solcher ernster rade
Gottis nicht verhyndert werde durch yhre buße.

So sprichstu/ hatt doch Paulus Ro: .13. gesagt/ Eyn igliche seel
solle der gewalt vnd vberkeyt vnterhan seyn. Vnd Petrus spricht/
Wyr sollen aller menschlicher ordnung vnterhan seyn. Antwortt/
Da komstu recht/ Denn die sprüch dienen für mich/ Sanct Paulus
redet von der vberkeyt vnd gewalt. Tu hastu izt gehöret/ das vber
sele niemandt kann gewalt habenn denn Gott. So muß yhe Sanct
Paulus von keynem gehorsam sagen kunden/ denn da die gewalt seyn
kan. Darauf folget/ das er redet nicht von glawbenn/ das weltliche
gewalt nicht solle habenn den glawbenn zugepieten/ sondern vonn
wüsserlichen gütern/ die selbenn zu ordenen vnd zu regirn auff erden.

Das geben auch seyne wörrt deutlich vnd klar/ dá er beyde der gewalt vnd gehorsam das zill steckt vnnnd spricht. Gebt yderman das seyne/ Schos/ des der schos/ zoll/ des der zoll/ ehre/ des die ehre/ furcht/ des die furcht ist. Sibe da / welltelich gehorsam vnnnd gewaltt gehet nur vber schos/ zoll/ ehre/ furcht eufferlich. Item da er spricht. Die gewaltt ist nicht zu furchten den gutten/ sondern den bösen wercken beschrecket er aber die gewaltt/ das sie nicht glawben odder Gottis wordtt/ sondern bösse werck meystern soll.

Das will auch S. Peter/ da er spricht. Menschlicher ordnüg. Ein kan yhe mēschlich ordnüg sich nicht strecken yn den hymel vn̄ vber die seele/ sondern nur auff erden auff den eufferlichen wandel der menschen vnternander/ da menschen sehen/ erkennen/ richten/ vireylen/ straffenn vnnnd erredten kunden.

Das alles hat auch Christus selbs seyn vnterscheydē vn̄ kurtz gefasset/ da er spricht Matt: .22. Gebt dem Keyser was des Keyfers ist/ vn̄ Gott was Gottis ist. Wenn nu Keyserlich gewalt sich streckete ynn Gottis reych vnd gewaltt/ vnd nicht eyn sonders were/ sollt ers nicht also vnterscheyden haben / Denn wie gesagt ist/ die seele ist nicht vnter Keyfers gewaltt/ Er kann sie wieder leren noch furen / widder tödten noch lebendig machen/ widder binden noch lösen/ widder richtē noch vireylen/ widder halten noch lassen/ wilchs doch seyn müste/ wo er gewaltt het vber sie zu gepieten vn̄ gesetz zu legen/ Sondern vber leyb/ gütt vn̄ ehre/ hat er wol solchs zu thun/ Den solchs ist vnter seynere gewalt.

Das alles hatt auch David lange zuuor mit eym kurtzenn seynem spruch verfasst/ da er spricht ps̄ .113. Den hymel hatt er des hymels herin geben/ Aber die erden hat er den menschen kindern geben/ das ist/ Was auff erden ist vnnnd zum zeytelichen yrdensichen reych gehört / dá hatt eyn mensche wol gewaltt von Gott/ Aber was zum hymel vnnnd zum ewigen reych gehört / das ist alleyn vnter dem hymelischen herin. Auch hatt das Mose nit vergessen/ da er spricht. Gen. 1. Got sprach/ Lass vns mēschen machen/ die vber die thier auff erden/ vber die fisch ym wasser/ vber die vögel ynn der lufft/ regiren/ da ist nur eufferlich regiment den mensche zu geeygent. Vnd summa/ ist das die meynung/ wie S. Petrus spricht. Act: .4. Man muß Gott mehr gehorchen den den menschen/ Da mit er yhe auch klerlich/ der wellteliche gewaltt eyn zill steckt / Denn wo man alles müst halten / was welltelich gewaltt wolte/ so were es vmb sonst gesagt/ Mann muß Gott mehr gehorchen den den menschen.

Wenn nu deyn furst oder weltlicher herr dir gepent/mit dem Bapst
zu halten/sonst odder so zu glauben/oder gepentt dyr bücher vonn dyr
zu thun/sollen also sagen/Es gepürt Lucifer nicht neben Got zu sitzen
Lieber herr/ich byn euch schuldig zu gehorchen mit leyb vnd güt/ge-
pietet myr nach ew: gewaltt maß/auffer den/so will ich folgen. Heyst
yhr: aber mich glauben vnd bücher von myr thun/so will ich nicht ges-
horchen/Denn da seytt yhr: eyn tyran/vnd greyfft zu hoch/gepietet/da
yhr: widder recht noch macht habe zc. Nympt er dir drüber deyn güt/
vnd strafft solchen ungehorsam/selig bistu/ vnd danck Gott/das du
würdig bist vmb götelichs worts willenn zu leyden / laß yhn nur toben
den narren/Er wirt seynen richter wol finden. Denn ich sage dyr/wo
du yhm nicht widderspüchst / vnd gibst yhm raum / das er dyr den
glauben odder die bücher nympt/so hastu warlich Gott verleucktet.

Als/das ich des eyn Exempel gebe/vñ Meyssen/Beyern vnd ynn
der Marck/vnd andern orten habenn die Tyrannen eyn gepot lassen
ausgehen/Man solle die new Testament ynn die empter hyn vnd her
vberantwortenn. Sie sollen yhr vnterthan also thun/Nicht eyn blett/
lin/nicht eyn buchstaben sollen sie vberantwortten / bey verlust yhrer
seligkeyt. Denn wer es thut/der vbergibt Chustum dem Herodes ynn
die hende/Denn sie handeln als Chustumörder/wie Herodes. Sondern
das sollen sie leyden/ob man yhn durch die heusser lauffen vnd nement
heyst mit gewaltt/es sey bücher odder güter/ Frenel soll mann nicht
widderstehen/sondern leyden/Man soll yhn aber nicht billichen/ noch
dazu dienen/oder folgen/oder gehorchen / mit eym fußtritt odder mit
eynem finger. Denn solch Tyrannen handelln wie weltlich fursten sol-
len/Es sind weltliche fursten/Die wellt aber ist Gottis feyndt / darüb
müssen sie auch thun was Gott widder/der wellt ebenn ist/das sie ia
nicht ehloß werden/sondern weltliche fursten bleybenn / Darumb laß
dichs nicht wundern/ ob sie widder das Euangelion toben vnd wue-
ten/Sie müssen yhrem titel vnd namen gnüg thun.

Vnd solt wissen/das von anbegynn der wellt gar eyn selzam vogel
ist vmb eyn klügen fursten/noch viel selzamer vmb ein frumen fursten.
Sie sind gemeyniglich die größten narren/odder die ergisten buben auff
erden/darumb man sich allzeyt bey yhn/des ergisten verfehenn vnd
wenig güts von yhn gewartten muß/sonderlich vñ götelichen sachen/
die der seelen heyl belangen/ Denn es sind Gottis stockmeyster vñ hen-
ger/vnd seyn götelicher zorn gebraucht yhr/zustraffen die bößen vnd
eufferlichenn fride zu haltenn. Es ist eyn grosser herr vnßer Gott/
D

Darumb muß er auch solch edelle / hochgepönte / reiche hencfer vñnd
böttell haben / vñd will / das sie reychtumb / ehre vñd furcht von yder
man die geusse vñ die menge haben sollen. Es gefellt seynem götlichen
willen / das wir seyne hencfer / gnedige herrn heysen / yhn zu fusse fallen
vñ mit aller demüt vnterthan seyen / so fern sie yhr handtwerck nicht
zu weytt strecken / das sie hyrtten auß hencfer werden wollen. Geredt
nu eyn furst / das er klüg / frum odder ein Christen ist / das ist der grossen
wunder eyns / vñ das aller theurist zeychen götlicher gnaden vber das
selb landt. Den nach gemeynem laufft gehet es nach dem spruch Isaia
am. 3. Ich will yhn kinder zu fursten geben / vñd maulaffen sollen yhr
herrn seyn. Vñd Osee. 13. Ich will dir ein könig auß zorn geben vñ mit
vngnaden widder nemen. Die wellt ist zu böse vñd nicht werd / das sie
viel klüger vñd frumer fursten haben solt / frösch müssen stöck haben.

So sprichstu abermal / Ya weltlich gewaltt zwingt nit zu glawben /
sondern weret nur eusserlich / das man die leutt mit falscher lere nit ver-
fure / wie kundt man sonst den kezern weren? Antwort. Das sollen die
Bischoff thun / den ist solch ampt befolhen vñd nicht den fursten. Den
kezerey kan man nymer mehr mit gewaltt weren. Es gehört eyn ander
griff daz / vñd ist hie eyn ander streyt vñnd handel den mit dem sch-
werd. Gottis wort soll hie streyten / wenns das nicht außricht / so
wirts wol vnaußgericht bleyben von weltlicher gewaltt / ob sie gleich
die wellt mit blütt fallet. Kezerey ist eyn geystlich ding / das kan man
mit keynem eyssen harwen / mitt keynem feror verbrennen / mitt keynem
wasser ertrencken. Es ist aber alleyn das Gottis wort da / das thuts /
wie Paulus sagt. 2. Cor. 10. Vñser waffen sind nit fleyschlich / sond
mechtig yn Gott / zü verstören allen radt vñ höhe / so sich wider gottis
erkentnis auff lehener / vñ nemē gefangē allē syn vnter den dienst Cristli.

Dazu ist keyn grosser stercke des glawbens vñd der kezerey / den wo
man on Gottis wort mit blosser gewaltt da wider handelt. Den man
helles dafur gewißlich / das solche gewaltt nit rechte sach hatt / vñnd
widder recht handele / weyl sie on Gottis wort feret / vñ sich sonst nicht
den mit blosser gewaltt zü behelffen weys / wie die vnuerstandige thiere
thun. Den man auch yn weltlichen sachen nicht kan mit gewaltt fa-
ren / es sey den das vnrecht zuuor mit rechte vberwunden. Wie viel vn-
möglicher ist / yn disen hohen geystlichen sachen / mit gewaltt on rechte
vñnd Gottis wort handeln? Darumb sihe / wie seyne klüge tuncfern
myr das sind / Sie wollen kezerey vertreyben / vñd greysen nichts an /
den da mit sie den widerpart nur stercken / sich selb verdecktig vñ yhe

ne rechtfertig machen. Lieber wiltu Kezerey vertreyben/so mustu den
griff treffen/das du sie für allen dingen auß dem hertzen reysst/vnnd
grundelich mit willen abwendest/das wirst du mit gewalt nicht ein/
den/sondern nur stercken.

Was hilfft dichs den/so du Kezerey yn dem hertzen sterckest / vnd nur
außwendig auff der zungen schwachist/vnd zu liegen dringest? Gottis
wortt aber/das erleucht die hertzen/ vnnd da mit fallen denn von yhn
selb alle Kezerey vnd yrehumb auß dem hertzen.

Von solchem verstorien der Kezerey/ hat der prophet Isaias verkun-
digt am. 11. vn gesagt. Er wirt die erden schlagen mit der rütten seyns
munds/vn den gottlosen tödten mit dem geyst seyner lippen. Da sihet
stu/das durch den munde außgerichtet wirt/ so d gotlose soll getödtet
vnd bekeret werden. Summa Summarū/solche fürsten vnd tyrannen
wissen nicht/das wider Kezerey streyttē/ sey wider den teuffel streyten/
der die hertzen mit yrehum besitzet/wie Paulus spricht Ephē. 6. Wyr
haben nicht mit fleysch vnd blütt zu streyten/ sondern mit der geystli-
chen bößheyt mit den fürsten die disse finsternis regirn zc. Darumb so
lange man nicht den teuffel abstosst vnnd von den hertzen iagt/ so ist
yhm eben/ wen ich mit schwerd odder feur seyne gefess vmbunge/ als
wen ich mit eym strohalm wider den blitz stritte. Das hat alles reich-
lich Job am. 41. bezeugt/da er sagt. Wie der teuffel eyssen wie stro/acht
vnd keyne gewalt aufferden furchte. Man sihet es auch wol/ ynn der
erfarung. Den ob man gleych alle Juden vnnd Kezer mit gewalt ver-
brennet/so ist vnd wirt doch keyner da durch vberwundē noch bekeret.

Doch solche welt sol solche fürstē habē/das yhe kein teyl seins ampts
wartte. Die Bischoff sollen das wortt Gottis lassen ligen/vn die seelen
nicht da mit regirn/sondern sollen den weltlichen fürsten befehlen/das
die selben mitt dem schwerdt daselbs regirn. Widerumb / die weltliche
fürsten sollen/wucher/raub/ehburch/mord/vn ander böße werck laß-
sen gehen vn selbs treybe/ darnach die bischoffe/lassen mit ban brieffen
straffen/vnd also den schuch feyn vmb keren/ Mit eyssen die seelen vnd
mit brieffen den leyb regirn/ Das weltlich fürsten geystlich vnd geyst-
liche fürsten weltlich regirn. Was hat der teuffel sonst zu schaffen auff
erden/den das er mit seyner volck also gauckele vn sasnacht spiel treybe?
Das sind vnser Christliche fürsten / die den glawben verteydigen vnd
den türcken fressen. Na freylich seyne gesellē/auff die wol zu vertrauen
ist/sie werden mit solcher feyner klügheytt etwas außrichten / nemlich/
das sie den halß stürzen/vn land vn leute yn iamer vn nott bringen.

Ich wolle aber den verblendten leuten gar trewlich radten/ das sie
sich fürsehen/ für eynem kleynkleynen sprüchlin/ 8 ym. 106. psalm stet.
Es fundic contemptum super principes. Ich schwere euch bey Gott/
werdet yhrs versehen/ das diß kleyne sprüchlin vber euch ynn den sch/
wanck kompt/ so seytt yhr verloren/ wen auch ewer iglicher so mech/
tig als der Türck were/ vnd wirt euch ewer schnauben vñ toben nichts
helffen. Es ist schon ein groß teyl angangen. Denn gar wenig fürsten
sind/ die man nicht für narren odder buben hellt/ das macht sie beweyß/
sen sich auch also/ vnd der gemeyn man wirt verstendig/ vnd der für/
sten plage (die Gott contemptū heysst) geweltiglich da her gehet/ vn/
ter dem possel vnd gemeynem man/ vñ soiget yhm werde nicht zu we/
ren seyn/ die fürsten stellen sich denn fürstlich/ vnd fahen widder an mit
vernunfft vñnd seuberlich zu regirn. Man wirt nicht/ man kan nicht/
man will nicht/ ewer tyranney vnd mutwillen die lunge leyden/ Lieben
fürsten vnd herin/ da wisset euch noch zu richten/ Gott wils nicht len/
ger haben. Es ist igt nicht mehr eyn wellt/ wie vorzeytten/ da yhr die
leutt wie das wild iaget/ vnd tryebet. Darumb laßt ewr freuel vñnd
gewalt/ vnd denckt/ das yhr mit recht handelt/ vnd laßt Gottis wort
seynen gang haben/ den es doch haben will/ muß vñnd soll/ vñnd yhr
nit weren werdet. Ist kezerrey da/ die vberwinde man wie sichs gepürt
mit gottis wort. Werdet yhr aber viel schwerd zuckens treybē/ so siche
zu das nicht eyner kome/ 8 es euch heysse eynstecken nit yñ gotts namē.
Nöchstu aber sprechen/ Weyl den nu vnter den Christen keyn welt/
lich schwerd seyn soll/ wie will man sie denn eufferlich regirn? Es muß
yhe vberkeyt auch vnter den Christen bleyben. Antwort. Vnter den
Christen soll vñnd kan keyn vberkeyt seyn/ Sondern eyn iglicher ist zu
gleich dem andern vnterthan/ wie Paulus sagt. Ro. .12. Ein iglich/
er soll den andern seynen vbersten halten. Vnd Petrus. 1. Pe. .5. Seyt
allesamt vnterinander vnterthan. Das will auch Christus Luce. 14.
Wenn du zur hochzeyt geladen wirst/ so setze dich aller vnterst an.
Es ist vnter den Christen keyn vberster/ denn nur Christus selber vñnd
alleyn. Vnd was kan da für vberkeyt seyn/ da sie alle gleich sind vñnd
eynerley/ recht/ macht/ gütt vñnd ehre haben? dazu keyner begerd des
andern vberster zu seyn/ sondern iglicher will des andern vnterster seyn/
kand man doch/ wo solch leutt sind/ kein vberkeyt auffrichtē/ ob mans
gerne thun wolt/ weyl es die art vñ natur nicht leydet/ vbersten haben/
da keyner vberster sey will noch kan/ Wo aber nicht solch leutt sind/ da
sind auch nicht rechte Christen.

Was sind denn die püester vnd Bischoffe? Antwort. Yhr regiment ist nicht ein vberkeyt odder gewalt/ sondern ein dienst vnd ampt/ Den sie nicht höher noch besser für andere Christen sind. Darumb sollen sie auch keyn gesetz noch gepott vber andere legen/ on der selben will vnd vrlaub/ sondern yhr regirn ist nicht anders/ denn Gottis wort treyben/ damit die Christen furen vnd ketzerey vberwinden. Denn wie gesagt/ ist/ die Christen kan man mit nichten/ on alleyn mit gottis wort regirn. Den Christen müssen ym glauben regiert werdē/ nicht mitt eusserlichen wercken. Glarobe kan aber durch keyn menschen wort/ sondern nur durch Gottis wort komen. Wie Paulus sagt. Ro: .10. Der glawb kompt durchs hören/ das hörienn aber kompt durchs wordt Gottis. Welche nun nicht glawben/ die sind nicht Christenn / die gehörien auch nicht vnter Christus reych/ sondern vnter das weltliche reych / das man sie mit dem schwerd vnd eusserlichem regiment zwingt vñ regire. Die Christen thun von yhn selbs vngewungen alles güttis/ vñ haben gnug für sich alleyn am Gottis wort. Doch dauon hab ich sonst viel vnd offte geschriben.

Das Dritte Teyll.

N wils auch zept seyn. das nach dem wyr wissenn / wie fern weltlich gewalt sich streckt/ wie sich eyn furst solle dreyen schicken/ vmb der willen/ die gern auch Christliche fursten vnd herrn sein wollten/ vnd auch ynn yhencs leben zu komen gedencen/ welcher gar fast wenig sind. Denn Christus beschreybt selbst die art der weltlichen fursten. Luce. 22. da er spricht. Die weltliche fursten hirschen/ vnd welche die vbersten sind/ faren mit gewalt. Denn sie meynen nicht anders/ wen sie herrn gepou oder er wele sind/ so haben sie recht dazu/ das sie yhn dienen lassen/ vnd mit gewalt regiren. Welcher nu eyn Christlicher furst seyn will/ d muß warlich die meynung ablegen/ das er hirschen vnd mit gewalt faren wolle. Den verflucht vnd verdampft ist alles leben/ das yhm selb zu nutz vnd zu güte gelebt vnd gesucht wirt/ verflucht alle werck die nicht ynn der liebe gehen. Den aber gehen sie in der liebe/ wen sie mit auffeygē lust/ nutz/ ehre/ gemach vnd heyl/ sondern auff anderer nutz ehre vnd heyl gerichte sind von ganzem herzen.